



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ  
ԵՎ ՍՊՈՐՏԻ ՆԱԽԱՐԱՐ

## ՀՐԱՄԱՆ

No 2410-Ա/2

«21» դեկտեմբերի, 2022 թ.

ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ ՊԱՅՄԱՆԱԳՐԱՅԻՆ  
(ԹԵՄԱՏԻԿ) ՖԻՆԱՆՍԱՎՈՐՄԱՆ ՇՐՋԱՆԱԿՆԵՐՈՒՄ «ՀԱՅԱՍՏԱՆԻ  
ՀԱՆՐԱՊԵՏՈՒԹՅԱՆ ԳԻՏԱԿԱՆ ՀԱՄԱՅՆՔԻՆ ԱՐՏԵՐԿՐԻ ԳԻՏՆԱԿԱՆՆԵՐԻ  
ԻՆՏԵԳՐՄԱՆՆ ԱԶԱԿՑՈՒԹՅԱՆ ԾՐԱԳԻՐ 2023» ՄՐՑՈՒՅԹԸ ԿԱԶՄԱԿԵՐՊԵԼՈՒ,  
ՀԱՅՏԱՐԱՐՈՒԹՅԱՆ ՏԵՔՍՏԸ  
ԵՎ ՀՐԱՎԵՐԻ ՓԱԹԵԹԸ ՀԱՍՏԱՏԵԼՈՒ ՄԱՍԻՆ

Առաջնորդվելով Հայաստանի Հանրապետության կառավարության 2001 թվականի նոյեմբերի 17-ի N 1122 որոշմամբ հաստատված «Գիտական և գիտատեխնիկական գործունեության պայմանագրային (թեմատիկ) ֆինանսավորման կարգի» 3-րդ կետով, ինչպես նաև հիմք ընդունելով Հայաստանի Հանրապետության վարչապետի 2019 թվականի հունիսի 1-ի N 661-Լ որոշմամբ հաստատված Հայաստանի Հանրապետության կրթության, գիտության, մշակույթի և սպորտի նախարարության կանոնադրության 19-րդ կետի 20-րդ ենթակետը՝

### Հ Ր Ա Մ Ա Յ ՈՒ Մ Ե Մ

1. Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում կազմակերպել «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» մրցույթը:

2. Հաստատել մրցույթի հայտարարության տեքստը՝ համաձայն հավելված N 1-ի և հրավերի փաթեթը՝ համաձայն հավելված N 2-ի:

3. Սույն հրամանի կատարման հսկողությունը հանձնարարել ՀՀ կրթության, գիտության, մշակույթի և սպորտի նախարարության գիտության կոմիտեի նախագահ Սարգիս Հայրոջանին:

ԺԱՆՆԱ ԱՆԴՐԵԱՍՅԱՆ

## Հ Ա Յ Տ Ա Ր Ա Ր ՈՒԹ Յ ՈՒ Ն

Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեն կազմակերպում է գիտական և գիտատեխնիկական գործունեության պայմանագրային (թեմատիկ) ֆինանսավորման նպատակով գիտական թեմաների հայտերի ընտրության «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» **ՄՐՑՈՒՅԹԸ**:

Մրցույթին մասնակցելու հայտ ներկայացվում է առցանց (on-line) ռեժիմով՝ [irf-2023-armenia.scs.am](http://irf-2023-armenia.scs.am) համակարգի միջոցով, մինչև 2023 թվականի փետրվարի 24-ը ներառյալ (**Հայտի** ուղարկման հնարավորությունն արգելափակվում է Երևանի ժամանակով ժամը 18:00-ին):

Մրցույթի հրավերի փաթեթը գետեղված է Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեի պաշտոնական կայքում՝ [www.scs.am](http://www.scs.am):

Մրցույթի վերաբերյալ լրացուցիչ տեղեկություններ և խորհրդատվություն կարելի է ստանալ Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեի գիտական գործունեության կազմակերպման վարչությունից՝ զանգահարելով (010) 210140 (ներքին 108) կամ ուղարկելով նամակ էլեկտրոնային փոստով՝ [scexpert@scs.am](mailto:scexpert@scs.am):

Հայաստանի Հանրապետության կրթության, գիտության,  
մշակույթի և սպորտի նախարարություն

## ՀՐԱՎԵՐ

### ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ ՊԱՅՄԱՆԱԳՐԱՅԻՆ (ԹԵՄԱՏԻԿ) ՖԻՆԱՆՍԱՎՈՐՄԱՆ ՇՐՋԱՆԱԿՆԵՐՈՒՄ «ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳԻՏԱԿԱՆ ՀԱՄԱՅՆՔԻՆ ԱՐՏԵՐԿՐԻ ԳԻՏՆԱԿԱՆՆԵՐԻ ԻՆՏԵԳՐՄԱՆՆ ԱԶԱԿՑՈՒԹՅԱՆ ԾՐԱԳԻՐ 2023» ՄՐՑՈՒՅԹԻ

## I. ԸՆԴՀԱՆՈՒՐ ԴՐՈՒՅԹՆԵՐ

### 1. Մրցույթը

- 1.1. Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» հայտերի (այսուհետ՝ **Հայտ**) ընտրության մրցույթն (այսուհետ՝ **Մրցույթ**) անցկացվում է համաձայն Հայաստանի Հանրապետության կրթության, գիտության, մշակույթի և սպորտի նախարարի 2022 թվականի դեկտեմբերի 22-ի N 2410-Ա/2 հրամանի:
- 1.2. **Մրցույթը** կազմակերպում է Հայաստանի Հանրապետության կրթության, գիտության, մշակույթի և սպորտի նախարարության գիտության կոմիտեն (այսուհետ՝ **Կոմիտե**)՝ առաջնորդվելով ՀՀ կառավարության 2001 թվականի նոյեմբերի 17-ի N 1122 որոշմամբ հաստատված գիտական և գիտատեխնիկական գործունեության պայմանագրային (թեմատիկ) ֆինանսավորման կարգով:
- 1.3. **Մրցույթն** ուղղված է արտերկրի գիտնականների ղեկավարությամբ Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող կազմակերպությունում (այսուհետ՝ **Կազմակերպություն**) հեռանկարային, ժամանակակից գիտական ուղղություններով նոր ստորաբաժանումներ ստեղծելուն:
- 1.4. **Մրցույթն** իրականացվում է գիտական և գիտատեխնիկական գործունեության բոլոր բնագավառներով (Հավելված N 2.1):
- 1.5. Ներկայացվող գիտական նախագիծը (այսուհետ՝ **Նախագիծ** (Հավելված N 2.4)) պետք է լինի հավակնոտ, խոստումնալից և իրագործելի:

- 1.6. **Մրցույթի** հրավերի փաթեթը սահմանում է դրան դիմելու կարգը, չափանիշները, **Հայտերի** գնահատման փուլերը և շահառու **Նախագծերի** ֆինանսավորումն ու հաշվետվողականությունը:

## 2. Նպատակը

- 2.1. **Մրցույթի** նպատակներն են.

- խթանել ներպետական և միջազգային համագործակցությունը,
- բարձրացնել **Կազմակերպության** ներուժը,
- ներգրավել երիտասարդ հետազոտողների և ասպիրանտների,
- նպաստել երիտասարդ հետազոտողների ինտեգրմանը միջազգային հետազոտական տարածքում,
- ներգրավել Սփյուռքի գիտական ներուժը,
- բարելավել գիտական միջավայրը,
- ստեղծել նոր, մրցունակ և հեռանկարային գիտական ստորաբաժանումներ:

## 3. Խումբը

- 3.1. **Նախագիծը** մշակում և իրականացնում է 2-5 անձից բաղկացած գիտահետազոտական խումբը (այսուհետ՝ **խումբ**), որը կազմված է արտերկրի ղեկավարից (այսուհետ՝ **Խմբի ղեկավար**) և կատարողներից:
- 3.2. **Խմբի ղեկավարը** և կատարողները **Նախագծի** իրականացման ընթացքում պետք է հանդիսանան Հայաստանի Հանրապետության քաղաքացիներ կամ Հայաստանի Հանրապետության ռեզիդենտներ, ինչպես նաև բնակվեն Հայաստանի Հանրապետությունում:
- 3.3. **Խմբի** անունից հանդես է գալիս միայն **Խմբի ղեկավարը**:

## 4. Խմբի ղեկավարը

- 4.1. **Խմբի ղեկավար** կարող է լինել այն անձը, ով՝

- ծնվել է 1973 թվականի հունվարի 1-ից հետո,
- **Նախագծի** իրականացման ողջ ընթացքում բնակվում է Հայաստանի Հանրապետությունում,
- գիտական աստիճանը ստացել է՝
  - Շեմ 1՝ 2016 թվականի հունվարի 1-ից հետո,

- Շեն 2՝ 2003 թվականի հունվարի 1-ից հետո:

- սույն **Մրցույթի** հրավերի հրապարակմանը նախորդող 4 տարիների ընթացքում գումարային 12 ամիս և ավելի Հայաստանի Հանրապետությունում չի ուսումնառել կամ աշխատել:

4.2. **Խմբի ղեկավարը** վերջին 5 տարիների համար պետք է ներկայացնի՝

**Հավելված 2.1-ով** ներկայացված գիտական և գիտատեխնիկական գործունեության «1-5» բնագավառների մասնագիտություններով.

- 4 գիտական հրապարակում միջազգային գիտատեղեկատվական շտեմարաններում («Science Citation Index Expanded (SCIE)», «Social Sciences Citation Index (SSCI)», «Emerging Sources Citation Index (ESCI)», «Arts&Humanities Citation Index (AHCI)»), **կամ** գրքերի հղման ինդեքսի (Book Citation Index) հրատարակիչների ցանկում ներառված հրատարակչությունների հրապարակած գրքի գլուխ կամ հոդված ժողովածուում, **կամ** «Scimago Journal & Country Ranking» պորտալի առնվազն Q4 քառորդ, իսկ գիտաժողովի նյութերի դեպքում՝ առնվազն Q2 քառորդին համարժեք SJR ինդեքս (SCImago Journal Rank Indicator) ունեցող պարբերականներում (այսուհետ՝ **ՄԳՇ**),
- **կամ** 1՝ առնվազն 5 տպագրական մամուլ ծավալ ունեցող մենագրություն, կոլեկտիվ մենագրություն կամ գիտական աշխատություն՝ հրատարակված Web of Science գիտատեղեկատվական հարթակի գրքերի հղման ինդեքսի (Book Citation Index) հրատարակիչների ցանկում ներառված հրատարակչություններում (այսուհետ՝ **Մենագրություն**):

**Հավելված 2.1-ով** ներկայացված գիտական և գիտատեխնիկական գործունեության «6» բնագավառի մասնագիտություններով՝

- 2 հրապարակում **ՄԳՇ**-ում,
- կամ 1 **Մենագրություն**,

**Մեկ Մենագրությունը համարժեք է 4 ՄԳՇ-ում հրապարակման:**

- 4.3. Բեալի ցանկերում (Beall's list, <https://beallslist.net/>) ներառված կեղծ կամ «գիշատիչ» հրատարակչություններում կամ պարբերականներում հրատարակված աշխատություն ներկայացնելու դեպքում **Հայտը** փորձաքննության ենթարկելու հարցը կքննարկվի Հայտերի գնահատման նպատակով ստեղծված մասնագիտական փորձագիտական խորհրդում (այսուհետ՝ **Խորհուրդ**):

## 5. Խմբի կատարողները

- 5.1. **Խմբի** կատարողները կարող են լինել ինչպես Հայաստանի Հանրապետությունից, այնպես էլ արտերկրից:
- 5.2. **Խմբի** կատարողները պետք է հանդիսանան **Նախագծի** գիտական և գիտատեխնիկական բնագավառին առնչվող մասնագիտությամբ բակալավրիատի առնվազն երրորդ կուրսի ուսանողներ:
- 5.3. Հավելված 2.1-ով ներկայացված գիտական և գիտատեխնիկական գործունեության «1-4» բնագավառների համար կատարողները կարող են լինել **Նախագծի** գիտական և գիտատեխնիկական բնագավառին առնչվող մասնագիտությամբ բակալավրիատի առնվազն առաջին կուրսի ուսանողներ, եթե դպրոցական առարկայական օլիմպիադայի հանրապետական փուլում 11-րդ կամ 12-րդ դասարաններում արժանացել են առնվազն երրորդ կարգի դիպլոմի:
- 5.4. **Խմբում** պետք է ընդգրկվի՝
- առնվազն 3 անդամ (ներառյալ **Խմբի ղեկավարը**)՝ Հավելված 2.1-ով ներկայացված գիտական և գիտատեխնիկական գործունեության «1-4» բնագավառների համար,
  - առնվազն 2 անդամ (ներառյալ **Խմբի ղեկավարը**)՝ Հավելված 2.1-ով ներկայացված գիտական և գիտատեխնիկական գործունեության «5-6» բնագավառների համար:
- 5.5. **Խմբի** անդամներից առնվազն երկուսը պետք է ծնված լինեն 1988 թվականի հունվարի 1-ից հետո և կարող են լինել առնվազն բակալավրիատի երրորդ կուրսի ուսանողներ: Նշված տարիքը կարող է բարձրանալ.
- ՀՀ զինված ուժերում ծառայած լինելու դեպքում՝ 2 տարով,
  - երեխայի խնամքի արձակուրդում գտնվելու դեպքում՝ յուրաքանչյուր երեխայի համար՝ 1 տարով:
- 5.6. **Խմբի** երիտասարդ կատարողներից առնվազն մեկը չպետք է լինի Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող որևէ կազմակերպության աշխատակից:
- 5.7. **Խմբի** անդամները (ներառյալ **Խմբի ղեկավարը**) չեն կարող ընդգրկվել սույն **Մրցույթին** ներկայացված մեկից ավելի **Հայտերում**, ինչպես նաև չեն կարող հանդիսանալ «Առաջատար հետազոտությունների աջակցության», «Գիտական խմբերի մեկնարկի կամ լաբորատորիաների (բաժինների) ամրապնդմանն աջակցության» «Գիտական խմբերի մեկնարկի» և «Գիտական խմբերի կամ

լաբորատորիաների ամրապնդման», «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2022» և «Հեռավար լաբորատորիաների հիմնադրման ծրագիր 2022» մրցույթների շահառուներ:

## 6. Գործընկերը

- 6.1. **Խումբը** պետք է ունենա արտերկրից գործընկեր (Foreign Partner/Collaborator) (այսուհետ՝ **Գործընկեր**):
- 6.2. **Գործընկեր** կարող է լինել այն անձը, ով՝
  - ունի գիտական աստիճան,
  - համապատասխան մասնագիտությամբ աշխատում է օտարերկրյա գիտական կազմակերպությունում:
- 6.3. **Գործընկերոջ** Հիրշի ինդեքսը (h-index)՝ ըստ «Scopus» (<https://www.scopus.com/freelookup/form/author.uri>) գիտատեղեկատվական շտեմարանի տվյալների, Հավելված 2.1-ում ներկայացված գիտական և գիտատեխնիկական գործունեության «1-4» բնագավառների մասնագիտություններով իրականացվելիք **Նախագծերի** համար պետք է լինի առնվազն 10, իսկ «5-6» բնագավառների մասնագիտություններով իրականացվելիք **Նախագծերի** համար՝ առնվազն 3:
- 6.4. **Գործընկերը** չի հանդիսանում Խմբի անդամ, և վերջինիս համար աշխատանքի վարձատրություն չի նախատեսվում:
- 6.5. **Գործընկերը Խմբի ղեկավարին** է տրամադրում իր մասնագիտական ինքնակենսագրությունը (CV) և հաստատող նամակը (Confirmation Letter), որով հավաստում է, որ ծանոթ է **Նախագծի** բովանդակությանը, համաձայն է մասնակցել հետազոտական աշխատանքներին և ծանոթ է իր գործառույթների շրջանակին, ինչպես նաև նախատեսվող համատեղ միջոցառումներին (գիտափորձեր, քննարկումներ, սեմինարներ և այլն):
- 6.6. **Նախագծի** իրականացման ողջ ժամանակահատվածում (60-ամսյա կտրվածքով) **Գործընկերը** պետք է գումարային առնվազն 25 օր գտնվի Հայաստանի Հանրապետությունում և գումարային առնվազն 25 օր իր գիտական կազմակերպությունում ընդունի **Խմբի** անդամներին:

## 7. Կազմակերպությանը ներկայացվող պահանջները

- 7.1. **Կազմակերպությունը** պետք է լինի Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող:
- 7.2. **Կազմակերպությունը պետք է** աջակցի **Նախագծի** իրականացմանը:
- 7.3. **Կազմակերպությունը խմբի ղեկավարին** է տրամադրում **Կազմակերպության** (բուհի ֆակուլտետի) գիտական (գիտատեխնիկական) խորհրդի եզրակացությունը (Board Conclusion), որտեղ նշվում է **Կազմակերպության** գիտական ուղղություններին **Նախագծի** համապատասխանությունը, կարևորությունը և արդիականությունը:
- 7.4. **Կազմակերպության** ղեկավարը **խմբի ղեկավարին** է տրամադրում տեղեկանք, որ ծանոթ է **Մրցույթի** հրավերի պայմաններին և պատրաստ է **Կազմակերպության** ֆինանսական ռեսուրսներով ապահովել Շեմ 1-ի դեպքում առնվազն հրավերի «7.8.» ենթակետով նշված պայմանը, իսկ **Նախագծի** հաջող ընթացքի պարագայում Շեմ 2-ի դեպքում՝ հրավերի «7.11.» ենթակետում նշված ստորաբաժանման ձևավորումը:
- 7.5. **Նախագծի** իրականացման ընթացքում **խմբի ղեկավարին** կազմակերպչական հարցերում աջակցություն ցուցաբերելու համար **Կազմակերպության** ղեկավարը կարող է նշանակել պատասխանատու անձ:
- 7.6. **Կազմակերպությունը** հասանելիություն է ապահովում առկա ենթակառուցվածքներին և սարքավորումներին:
- 7.7. Ֆինանսական նախահաշվի (այսուհետ՝ **Նախահաշիվ**), «Այլ ծախսեր» հոդվածի «Վերադիր ծախսեր» ենթահոդվածով նախատեսված ֆինանսական միջոցներով **Կազմակերպության** ղեկավարն ապահովում է **Նախագծի** կատարման համար անհրաժեշտ պայմաններ ստեղծելուն ուղղված ծախսերը:
- 7.8. **Կազմակերպությունը**, առնվազն **Նախագծի** կատարման ողջ ընթացքի համար, **խմբի ղեկավարին** ներառում է գիտական և գիտատեխնիկական գործունեության բազային ֆինանսավորմամբ ծրագրում (եթե ներառված չէ):
- 7.9. **Կազմակերպության, Կոմիտեի** և ֆինանսավորման երաշխավորված **խմբի ղեկավարի** միջև ՀՀ «Քաղաքացիական օրենսգրքով» սահմանված կարգով կնքվում է «**Գիտական և գիտատեխնիկական գործունեության** պայմանագրային (թեմատիկ) ֆինանսավորման շրջանակներում «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» մրցույթի **համար պետության կողմից դրամաշնորհի ձևով տրամադրվող**



**Ֆինանսական աջակցության գումարների օգտագործման մասին» եռակողմ պայմանագիր (այսուհետ՝ Պայմանագիր):**

- 7.10. **Նախագծի** իրականացման համար ձեռքբերված սարքերը, նյութերը և ծառայությունները ներառվում են **Կազմակերպության** հաշվեկշռում՝ հետագայում կանոնադրական նպատակներով օգտագործելու (գիտական և գիտահետազոտական աշխատանքների իրականացման) համար:
- 7.11. Շեմ 2-ի դեպքում՝ մինչև **Նախագծի** կատարման 24 ամիսը լրանալը **Խմբի ղեկավարի** (ստորաբաժանման ղեկավար) և **Խմբի** կատարողների (ստորաբաժանման աշխատակիցներ) ընդգրկմամբ **Կազմակերպությունում** ձևավորվում է նոր գիտական ստորաբաժանում (խումբ, լաբորատորիա, բաժին):

## **8. Ժամկետները**

- 8.1. **Նախագծերի** իրականացման տևողությունը 60 ամիս է:
- 8.2. **Մրցույթին** դիմելու վերջնաժամկետն է 2023 թվականի փետրվարի 24-ը: (**Հայտերի** ուղարկման հնարավորությունը կարգելափակվի Երևանի ժամանակով ժամը 18:00-ին):
- 8.3. **Պայմանագրերը** կկնքվեն **Մրցույթի** արդյունքները հայտնի դառնալուց հետո 10-օրյա ժամկետում:
- 8.4. **Նախագծերը** սկսվում և իրականացվում են **Պայմանագրում** նշված ժամկետներում:

## **9. Ակնկալվող արդյունքները**

- 9.1. **Նախագծի** կատարման 35 ամիսը լրանալուց հետո **Խմբի ղեկավարը** պետք է ներկայացնի **Խմբի** անդամների՝ **Մրցույթի** իրավերի «18.2.» ենթակետով սահմանված նշումով.

Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով՝

- առնվազն 3 գիտական հրապարակում **ՄԳՇ**-ում,
- կամ 1 **Մենագրություն**:

Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով՝

- առնվազն 2 գիտական հրապարակում **ՄԳՇ**-ում,
- կամ 1 **Մենագրություն**:

- 9.2. **Նախագծի** ավարտից հետո (60 ամսվա կտրվածքով) **Խմբի** անդամները պետք է ունենան **Մրցույթի** հրավերի «18.2.» ենթակետով սահմանված նշումով՝
- Հավելված 2.1-ով ներկայացված գիտական և գիտատեխնիկական գործունեության «1-5» բնագավառների մասնագիտություններով՝
    - առնվազն 10 գիտական հրապարակումներ **ՄԳՇ**-ում, որոնցից առնվազն երկուսը՝ Q1 և առնվազն երկուսը՝ Q2 քառորդներում ընդգրկված պարբերականներում,
    - կամ 3 **Մենագրություն**:
  - Հավելված 2.1-ով ներկայացված գիտական և գիտատեխնիկական գործունեության «6» բնագավառի մասնագիտություններով՝
    - առնվազն 6 գիտական հրապարակումներ **ՄԳՇ**-ում, որոնցից առնվազն երկուսը՝ Q1 և առնվազն երկուսը՝ Q2 քառորդներում ընդգրկված պարբերականներում,
    - կամ 2 **Մենագրություն**:

**Մեկ Մենագրությունը համարժեք է ՄԳՇ-ում ընդգրկված 4 հրապարակման:**

- 9.3. Որպես **Նախագծի** արդյունք ներկայացված գիտական հրապարակումներից առնվազն կեսում **Խմբի ղեկավարը** պետք է լինի կամ առաջին, կամ վերջին, կամ նամակագրություն վարող (corresponding author) հեղինակ, կամ ունենա որևէ համարժեք նշում:
- 9.4. **Նախագծի** կատարման արդյունքում «1-5» բնագավառների մասնագիտություններով ակնկալվում է 25000.0 հազար ՀՀ դրամը, իսկ «6» բնագավառի մասնագիտություններով 15000.0 հազար ՀՀ դրամը գերազանցող միջազգային գիտական դրամաշնորհի առնվազն մեկ դիմում (submitted grant):
- 9.5. «9.2.» ենթակետում նշված պայմանը չկատարելը/կատարելը կանդրադառնա հետագայում **Կոմիտեի** հայտարարած մրցույթներին **Խմբի** անդամների կողմից ներկայացվող հայտի փորձագիտական գնահատականի վրա՝ դրանից հանելով/գումարելով տվյալ մրցույթում հայտի առավելագույն գնահատականի 5 տոկոսի չափով միավոր՝ **Խմբի ղեկավարի** ընդգրկված լինելու դեպքում և 1 տոկոսի չափով միավոր՝ **Նախագծի** կատարողներից յուրաքանչյուրի դեպքում: Հանրագումարում կհանվի/կգումարվի տվյալ մրցույթում հայտի առավելագույն գնահատականի ոչ ավելի, քան 5 տոկոսի չափով միավոր: Հետագա մրցույթներին **Խմբի** անդամների կողմից ներկայացված հայտի փորձագիտական գնահատականի

նվազեցումը կչեղարկվի **Նախագծի** ավարտից հետո **Կոմիտե** ներկայացվող ամփոփիչ հաշվետվությունն ընդունելու մասին **Խորհրդի** եզրակացության հիման վրա:

- 9.6. **Նախագծի** իրականացման ընթացքում **Խմբի** անդամները պետք է ապահովեն **Նախագծի** և/կամ գիտության տվյալ բնագավառի վերաբերյալ գիտահանրամատչելի նյութերի ստեղծում և հանրայնացում (հարցազրույցներ, հրապարակումներ գիտահանրամատչելի ամսագրերում, տեսանյութերի ստեղծում և տարածում, լայն լսարանի համար քննարկումների կազմակերպում և այլն), որոնք հաշվի կառնվեն **Խորհրդի** կողմից ամփոփիչ հաշվետվությունն ընդունելու մասին եզրակացություն տալիս:
- 9.7. Որպես **Նախագծի** արդյունք ներկայացված գիտական հրապարակումներում հեղինակի աշխատավայր (affiliation) պետք է նշվի **Կազմակերպությունը**:

## II. ՀԱՅՏԻ ԼՐԱՑՄԱՆ ԵՎ ՆԵՐԿԱՅԱՑՄԱՆ ԿԱՐԳԸ

### 10. Հայտ ներկայացնելը

- 10.1. **Հայտը** լրացնում և ներկայացնում է Խմբի ղեկավարը՝ [irf-2023-armenia.scs.am](http://irf-2023-armenia.scs.am) առցանց համակարգի միջոցով՝ մինչև 2023 թվականի փետրվարի 24-ը ներառյալ (**Հայտի** ուղարկման հնարավորությունն արգելափակվում է Երևանի ժամանակով ժամը 18:00-ին):
- 10.2. **Կոմիտե** ներկայացվում են հետևյալ փաստաթղթերը.
- Խմբի ղեկավարի** դիմումը (Հավելված N 2.2),
  - Նախահաշիվը,**
  - Կազմակերպության** կամ ֆակուլտետի գիտական (գիտատեխնիկական) խորհրդի եզրակացությունը, որը պետք է պարունակի տեղեկատվություն **Կազմակերպության** գիտական ուղղություններին **Նախագծի** համապատասխանության, կարևորության և արդիականության վերաբերյալ:
  - Կազմակերպության** ղեկավարի գրությունը՝ նոր գիտական ստորաբաժանում կազմավորելու վերաբերյալ,

- կատարողների վերջին դիպլոմների պատճենները, իսկ ասպիրանտ կամ ուսանող հանդիսանալու դեպքում՝ համապատասխան տեղեկանք(ներ)ը,
- **Գործընկերոջ** մասնագիտական ինքնակենսագրությունը (CV) և հաստատող նամակը (Letter of Confirmation),
- **Խմբի** անդամների մասնագիտական ինքնակենսագրությունները (CV):

10.3. Անհրաժեշտության դեպքում կարող են պահանջվել այլ փաստաթղթեր:

10.4. **Կազմակերպության** կողմից ներկայացվող բոլոր **Հայտերին** վերաբերող փաստաթղթերը մեկ ընդհանուր փաթեթով **Կոմիտե** է ներկայացնում **Կազմակերպության** լիազորված անձը (գիտական քարտուղար կամ այլ)՝ առձեռն մինչև 2023 թվականի մարտի 3-ը ներառյալ աշխատանքային օրերին ժամը 09:00-13:00 և 14:00-18:00 (Օրբելի եղբայրների 22, 7-րդ հարկ, 706 սենյակ):

10.5. **Մրցույթի** վերաբերյալ լրացուցիչ տեղեկատվություն և խորհրդատվություն կարելի է ստանալ **Կոմիտեի** գիտական գործունեության կազմակերպման վարչությունից, հեռախոս՝ (010) 210140 (ներքին 108), էլեկտրոնային փոստ՝ [scexpert@scs.am](mailto:scexpert@scs.am):

**Ուշադրություն. Կոմիտեն քննարկման է ընդունում միայն առցանց համակարգի կողմից ձևավորված Հայտերը: Հայտերը, որոնք չեն ուղարկվել վերը նշված կարգի և ժամկետների համաձայն, քննարկման ենթակա չեն:**

11. **Նախահաշվի կազմությունը Նախահաշիվը** կազմված է «Աշխատանքի վարձատրություն» և «Այլ ծախսեր» հոդվածներից: «Այլ ծախսեր» հոդվածը բաղկացած է «Սարքեր, նյութեր և ծառայություններ», «Գործուղումներ», «Խմբի կամ լաբորատորիայի ամրապնդում», «Փորձարարական հետազոտություններ» և «Վերադիր ծախսեր» ենթահոդվածներից:

11.2. **Նախահաշվի** «Աշխատանքի վարձատրություն» հոդվածում աշխատանքի վարձատրության (ներառյալ հարկերը և այլ պարտադիր վճարները) առավելագույն չափը նախատեսել.

- Շեմ 1՝ **Խմբի ղեկավարի** համար՝ ամսական առավելագույնը՝ 400.0 հազար դրամ, կատարողների համար՝ (բացի **Գործընկերոջից**) միջին ամսական վարձատրությունը՝ 250.0 հազար ՀՀ դրամ:
- Շեմ 2՝ **Խմբի ղեկավարի** համար ամսական առավելագույնը՝ 600.0 հազար դրամ, իսկ կատարողների համար (բացի **Գործընկերոջից**) միջին ամսական վարձատրությունը՝ 300.0 հազար դրամ:

- 11.3. Եթե աշխատանքի վարձատրության համար նախատեսված գումարը պակաս է վերոնշյալ ծավալից, ապա տարբերությունը կարելի է օգտագործել **Նախահաշվի** «Այլ ծախսեր» հոդվածում:
- 11.4. Ընտանիքի անդամ(ներ)ի հետ Հայաստանի Հանրապետություն տեղափոխվելու դեպքում՝ **Խմբի ղեկավարի** աշխատանքի վարձատրության չափը, հետևաբար՝ նաև **Նախագծի** ֆինանսավորման աշխատանքի վարձատրության առավելագույն չափը 12-ամսյա կտրվածքով կարող է ավելանալ 1800.0 հազար դրամի չափով:
- 11.5. **Նախահաշվի** «Այլ ծախսեր» հոդվածի «Սարքեր, նյութեր և ծառայություններ», «Գործուղումներ» և «Վերադիր ծախսեր» ենթահոդվածներով գումարային 12-ամսվա կտրվածքով կարելի է նախատեսել մինչև 1000.0 հազար դրամ՝ **Խմբի յուրաքանչյուր** անդամի հաշվարկով: Այս գումարը կարող է ավելանալ «11.3.» կետով սահմանված տարբերության չափով:
- 11.6. **Նախահաշվի** «Այլ ծախսեր» հոդվածի «Սարքեր, նյութեր և ծառայություններ» ենթահոդվածով կարող են նախատեսվել գիտական սարքավորումների, հետազոտությունների ընթացքում օգտագործվող նյութերի ձեռքբերման և/կամ ծառայությունների ծախսերը: **Խմբի ղեկավարը** ծառայությունների մատուցման պայմանագրեր կարող է կնքել միայն իրավաբանական անձանց հետ՝ համաձայնեցնելով **Կոմիտեի** հետ:
- 11.7. **Նախահաշվի** «Այլ ծախսեր» հոդվածի «Գործուղումներ» ենթահոդվածով նախատեսվող գումարը կարող է օգտագործվել **Նախագծի** ընթացքի ու արդյունքների ներկայացման նպատակով միջազգային գիտաժողովներին մասնակցության համար, ինչպես նաև **Գործընկերոջ** և **Խմբի** անդամների փոխադարձ այցելությունների գործուղման ծախսերը հոգալու համար:
- 11.8. **Նախահաշվի** «Այլ ծախսեր» հոդվածի «Խմբի կամ լաբորատորիայի ամրապնդում» ենթահոդվածով առաջին 12-ամսվա համար լրացուցիչ կարող է հայցվել 3000.0 հազար դրամ (Շեմ 1) և 15000.0 հազար դրամ (Շեմ 2), որը կարող է օգտագործվել խմբի կամ լաբորատորիայի ենթակառուցվածքի բարելավման ուղղությամբ և **Նախագծի** կատարման համար անհրաժեշտ այլ ծախսերի համար:
- 11.9. **Նախահաշվի** «Այլ ծախսեր» հոդվածի «Փորձարարական հետազոտություններ» ենթահոդվածով լրացուցիչ 20000.0 հազար դրամ կարող է հայցվել փորձարարական հետազոտություններ նախատեսող **Նախագծերի** համար, որը կարող է նախատեսվել

գիտական սարքավորումների և նյութերի ձեռքբերման և **Նախագծի** բնույթով պայմանավորված այլ ծախսերի համար:

- 11.10. Գիտական սարքերի և սարքավորումների ձեռքբերումը չի կարող նախատեսվել **Նախագծի** իրականացման վերջին տարում:
- 11.11. **Նախահաշվի** «Այլ ծախսեր» հոդվածի «Վերադիր ծախսեր» ենթահոդվածով (60 ամսվա համար) կարող է հայցվել մինչև 2500.0 հազար դրամ:
- 11.12. Գործուղումների օրապահիկը և գիշերավարձը հաշվարկելիս անհրաժեշտ է առաջնորդվել Հայաստանի Հանրապետության կառավարության 2005 թվականի դեկտեմբերի 29-ի N 2335-Ն որոշմամբ:
- 11.13. **Նախահաշվի** բոլոր ենթահոդվածների ծախսերը պետք է հիմնավորել **Նախահաշվի** մեկնաբանության մեջ:
- 11.14. **Նախահաշվի** հիմնավորվածությունը և բաշխումը կարող են լրամշակվել **Խորհրդի** առաջարկությամբ և **Խմբի ղեկավարի** համաձայնությամբ:

### III. ՀԱՅՏԵՐԻ ԳՆԱՀԱՏՈՒՄԸ

**12. Հայտերի** համապատասխանությունը **Մրցույթի** պայմաններին.

- 12.1. **Կոմիտեն** ուսումնասիրում է **Մրցույթին** ներկայացված **Հայտերի** համապատասխանությունը **Մրցույթի** պայմաններին,
- 12.2. Բեալի ցանկերում (Beall's list, <https://beallslist.net/>) ներառված կեղծ կամ «գիշատիչ» հրատարակչություններում կամ պարբերականներում հրատարակված աշխատությունների ներկայացվածությունը **Հայտում**,
- 12.3. Ստուգման արդյունքները տրամադրում է **Հայտերի** գնահատման համար ստեղծված **Խորհրդին**:
- 12.4. **Խորհրդի** կողմից քննարկվում է **Հայտը** փորձաքննության ենթարկելու հարցը:
- 12.5. **Խորհուրդը** հաստատում է փորձաքննության ենթակա **Հայտերի** ցանկը:

**13. Փորձաքննությունը**

- 13.1. **Խորհուրդը Կոմիտեի** հետ համատեղ մշակում և հաստատում է **Հայտերի** փորձաքննության առաջին և երկրորդ փուլերի (գիտական փորձաքննության և հարցազրույցի) գնահատման թերթիկները և վարման կարգը:

#### 14. **Փորձաքննության առաջին փուլը**

- 14.1. Փորձաքննության առաջին փուլում **Խորհուրդը**, հաշվի առնելով **Նախագծի** ընդարձակ ամփոփագիրը (Հավելված 2.3), **Խմբի ղեկավարի** գիտական հետազոծը (track record), մասնագիտական ինքնակենսագրությունը (CV), **Կազմակերպության և Գործընկերոջ** համապատասխանությունը **Նախագծի** նպատակներին, կոնսենսուսի սկզբունքով ձևավորում է առաջին փուլը հաղթահարած **Հայտերի** ցանկը, որոնք անցնում են փորձաքննության հաջորդ փուլ:
- 14.2. Փորձաքննության առաջին փուլը չհաղթահարած **Հայտերի Խմբի ղեկավարները** տեղեկացվում են այդ մասին:

#### 15. **Փորձաքննության երկրորդ փուլը**

- 15.1. Փորձաքննության առաջին փուլը հաղթահարած **Հայտերը** ենթարկվում են գիտական փորձաքննության, իսկ **Խմբի ղեկավարների** հետ անցկացվում են հարցազրույցներ: Այս փուլում գնահատվում են խնդրի արդի վիճակը, նորույթը, հեռանկարը, **Կազմակերպությունում** իրականացման նախադրյալները, համապատասխանությունը ոլորտի զարգացման տենդենցներին, աշխատանքի ծավալի և իրականացման ժամկետների հիմնավորվածությունը, համագործակցության նպատակահարմարությունը, **Խմբի ղեկավարի**, կատարողների, **Գործընկերոջ** որակավորումը և մասնագիտական համապատասխանությունը **Նախագծի** նպատակներին, գիտական արդյունքների տնօրինումը և տարածումը, **Նախահաշվի** հիմնավորվածությունը, ինչպես նաև **Մրցույթի** առանձնահատկություններից բխող այլ հարցեր:
- 15.2. **Հայտը** գիտական փորձաքննության է ենթարկվում առնվազն երկու փորձագետի կողմից: Որպես փորձագետ կարող է հանդես գալ նաև **Խորհրդի** անդամը:
- 15.3. Յուրաքանչյուր **Հայտի** համար փորձագետը լրացնում է գիտական փորձաքննության գնահատման թերթիկը:
- 15.4. Երկու փորձագետների գնահատականները գիտական փորձաքննության առավելագույն գնահատականի 30 և ավելի տոկոսով տարբերվելու դեպքում **Հայտը** ենթարկվում է փորձաքննության երրորդ փորձագետի կողմից: Այդ դեպքում գիտական փորձաքննության գնահատականը երեք փորձագետների՝ երկու իրար մոտ գնահատականների միջին թվաբանականն է: Երեք փորձագետների գնահատականների հավասար տարբերությունների դեպքում գիտական

փորձաքննության գնահատականը երկու առավելագույն գնահատականների միջին թվաբանականն է:

- 15.5. Գիտական փորձաքննության ժամանակ փորձագետի առավելագույն գնահատականը կազմում է **Հայտի** առավելագույն գնահատականի 50 տոկոսը:
- 15.6. Հարցազրույցի ժամանակ **Խորհրդի** յուրաքանչյուր անդամ լրացնում է հարցազրույցի գնահատման թերթիկը:
- 15.7. Հարցազրույցի առավելագույն գնահատականը կազմում է **Հայտի** առավելագույն գնահատականի 50 տոկոսը:
- 15.8. Փորձաքննության երկրորդ փուլի գնահատականը երկու փորձագետների գնահատականների միջին թվաբանականի և հարցազրույցի գնահատականների միջին թվաբանականի գումարն է:
- 15.9. **Կոմիտեի** և փորձագետների կողմից **Հայտի** բովանդակության, գիտական փորձաքննության ընթացքի և արդյունքի վերաբերյալ տեղեկությունների տրամադրումն այլ անձանց արգելվում է՝ համաձայն «Գիտական և գիտատեխնիկական փորձաքննության մասին» Հայաստանի Հանրապետության օրենքով սահմանված դրույթների:

## 16. Գնահատման արդյունքները

- 16.1. **Կոմիտեն** փորձաքննության երկրորդ փուլի արդյունքներով ձևավորում է **Հայտերի** վարկանիշային ցանկ՝ գնահատականների նվազման կարգով և ներկայացնում **Խորհրդին**՝ քննարկման:
- 16.2. **Խորհուրդը Կոմիտեի** նախագահին է ներկայացնում **Հայտերի** գնահատականների վարկանիշային ցանկը:
- 16.3. **Կոմիտեն**, ելնելով Հայաստանի Հանրապետության պետական բյուջեից գիտական և գիտատեխնիկական գործունեության պայմանագրային (թեմատիկ) ֆինանսավորման հատկացումների չափից, որոշում է գիտական և գիտատեխնիկական գործունեության յուրաքանչյուր բնագավառի շեմային գնահատականը և ՀՀ ԿԳՄՍ նախարարին է ներկայացնում ֆինանսավորման երաշխավորված **Հայտերի** ցանկը և նախատեսված ֆինանսավորման չափը հաստատելու մասին հրամանի նախագիծ:
- 16.4. **Մրցույթի** արդյունքում ֆինանսավորման երաշխավորված **Հայտերի** ցանկը հաստատվելուց հետո այն տեղադրվում է **Կոմիտեի** պաշտոնական կայքում:



- 16.5. **Կոմիտեն Կազմակերպության** ղեկավարին տրամադրում է տվյալ Կազմակերպության շահառու **Հայտերի** ցանկը և յուրաքանչյուր **Հայտի Նախահաշիվը**:
- 16.6. **Կոմիտեն Խմբի ղեկավարին** տրամադրում է փորձաքննության արդյունքները և անցողիկ շեմային գնահատականը:

#### IV. ԱՅԼ ԴՐՈՒՅԹՆԵՐ

##### 17. Հայտի չդիտարկվելը

17.1. **Հայտը** չի դիտարկվում հետևյալ դեպքերում.

- չի պարունակում բոլոր անհրաժեշտ փաստաթղթերը,
- բովանդակությամբ համընկնում է Հայաստանի Հանրապետության պետական բյուջեից ֆինանսավորվող կամ ֆինանսավորված որևէ գիտական նախագծի հետ,
- չի բավարարում **Մրցույթի** հրավերի պայմաններին,
- միաժամանակ ներկայացված է **Կոմիտեի** կողմից անցկացվող այլ մրցույթների:

##### 18. Այլ պայմաններ

18.1. Մտավոր սեփականության հեղինակային կամ արտոնագրային իրավունքի օբյեկտ հանդիսացող նյութեր պարունակող **Նախագիծ** և այնուհետև հաշվետվություն ներկայացնելու դեպքում **Խմբի ղեկավարը** պետք է առաջնորդվի «Հեղինակային իրավունքի և հարակից իրավունքների մասին» և «Գյուտերի, օգտակար մոդելների և արդյունաբերական նմուշների մասին» Հայաստանի Հանրապետության օրենքներով սահմանված դրույթներով:

18.2. **Նախագծի** շրջանակներում իրականացված հետազոտության արդյունքները գիտական ամսագրերում հրապարակելիս անհրաժեշտ է նշել **Կոմիտեի** կողմից ստացած աջակցության մասին.

- *This work was supported by the Science Committee of RA (Research project № \_\_\_\_\_).*

**Համապատասխան նշման բացակայության դեպքում հրապարակումը չի համարվելու Նախագծի արդյունք, հետևաբար՝ չի ընդունվելու հաշվետվության մեջ:**

18.3. **Նախագծի** իրականացման ընթացքում, յուրաքանչյուր 12 ամիսը լրանալուց հետո, տասնօրյա ժամկետում **Կոմիտե** է ներկայացվում ընթացիկ (տարեկան)

հաշվետվություն, որի հիման վրա **Խորհուրդը** տալիս է եզրակացություն՝ **Նախագծի** ֆինանսավորումը շարունակելու նպատակահարմարության մասին:

- 18.4. **Նախագծի** իրականացման 35 ամիսը լրանալուց հետո տասնօրյա ժամկետում **Կոմիտե** է ներկայացվում եռամյա հաշվետվություն՝ ներառելով **Նախագծի** ակնկալվող միջանկյալ արդյունքները, որոնց հիման վրա **Խորհուրդը** տալիս է եզրակացություն՝ **Նախագծի** ֆինանսավորումը դադարեցնելու կամ ևս 24 ամիս շարունակելու նպատակահարմարության մասին:
- 18.5. **Նախագծի** իրականացման ընթացքում **Կոմիտեն** կարող է իրականացնել **Նախագծի** մշտադիտարկում և արդյունքները ներկայացնել **Խորհրդին**:
- 18.6. **Նախագծի** ֆինանսավորումը շարունակելու նպատակահարմարության մասին եզրակացություն տալիս՝ **Խորհուրդը** պետք է հաշվի առնի նաև մշտադիտարկման արդյունքները:
- 18.7. **Նախագծի** հետագա ֆինանսավորումը դադարեցվում է ընթացիկ հաշվետվությունը սահմանված ժամկետում չներկայացնելու դեպքում:
- 18.8. **Նախագծի** իրականացման 60-րդ ամիսը լրանալուց հետո տասնօրյա ժամկետում **Կոմիտե** է ներկայացվում ամփոփիչ հաշվետվություն, որի հիման վրա **Խորհուրդը** տալիս է եզրակացություն՝ հաշվետվությունն ընդունելու մասին:
- 18.9. **Կոմիտեն** կարող է ֆինանսավորման երաշխավորված **Նախագծերի** անոտացիան և հաշվետվությունը հրապարակել տպագիր կամ էլեկտրոնային եղանակով:
- 18.10. **Կոմիտեի, Կազմակերպության** և ֆինանսավորման երաշխավորված **Հայտի Խմբի ղեկավարի** միջև կնքվում է **Պայմանագիր**՝ «18.11.» կետում նշված պայմանագրերի առկայության դեպքում:
- 18.11. Ֆինանսավորման երաշխավորված **Նախագծի Խմբի** կատարողների դրամաշնորհի շրջանակներում կնքված պայմանագրերի պատճենները ներկայացվում են **Կոմիտե**:
- 18.12. **Նախագծի** իրականացման ընթացքում (ոչ շուտ քան 12 ամիս անց) **Խմբի ղեկավարը** կարող է դիմել **Կոմիտե**՝ **Նախագծի** կատարողների թիվը **Նախագծին** առնչվող մասնագիտություն ունեցող առավելագույնը 2 մինչև 35 տարեկան կատարողներով ավելացնելու առաջարկով՝ ներկայացնելով համապատասխան հիմնավորում:
- 18.13. «18.12.» կետով ներգրավված կատարողները չպետք է լինեն Հայաստանի Հանրապետության պետական բյուջեի գիտական և գիտատեխնիկական գործունեության բազային ֆինանսավորմամբ ծրագիր իրականացնող որևէ կազմակերպության աշխատակից:

- 18.14. Կատարողների թիվն ավելանալու պարագայում **Խմբի ղեկավարի, Կազմակերպության** և **Կոմիտեի** միջև կնքված **Պայմանագրի** գինն ավելանում է յուրաքանչյուր նոր կատարողի համար մինչև 1800.0 հազար դրամով (12 ամսվա կտրվածքով):
- 18.15. **Խմբի ղեկավարը** կարող է դիմել **Կոմիտե**՝ կատարողի համարժեք փոփոխություն կատարելու՝ ըստ տարիքային խմբի և գիտական գործունեության արդյունավետության ցուցանիշի, կամ **Խմբի** անդամների թիվը մեկով կրճատելու միջնորդությամբ՝ ներկայացնելով համապատասխան հիմնավորում: **Խմբում** կատարողի փոփոխություն կատարելու դեպքում **Խմբի ղեկավարը Կոմիտե** է ներկայացնում նոր կատարողի հետ դրամաշնորհի շրջանակներում կնքված պայմանագրի պատճենը, իսկ խմբի անդամների թվի կրճատման դեպքում կնքվում է **Պայմանագրի** գնի փոփոխության մասին համաձայնագիր:

**ԳԻՏԱԿԱՆ ԵՎ ԳԻՏԱՏԵԽՆԻԿԱԿԱՆ ԳՈՐԾՈՒՆԵՈՒԹՅԱՆ �ՆԱԳԱՎԱՌՆԵՐԸ ԵՎ ՄԱՍՆԱԳԻՏՈՒԹՅՈՒՆՆԵՐԸ՝ ՀԱՄԱՊԱՏԱՍԽԱՆ ԴԱՍԻՉՆԵՐՈՎ**

|  |  |
|--|--|
| <p><b>1. �ՆԱԿԱՆ ԳԻՏՈՒԹՅՈՒՆՆԵՐ</b></p> <p>1.1 Մաթեմատիկա</p> <p>1.2 Ինֆորմատիկա և համակարգչային գիտություններ</p> <p>1.3 Ֆիզիկա և աստղագիտություն</p> <p>1.4 Քիմիա</p> <p>1.5 Երկրի մասին և դրան հարակից քննապահպանական գիտություններ</p> <p>1.6 Կենսաբանական գիտություններ</p> <p><b>2. ՃԱՐՏԱՐԱԳԻՏՈՒԹՅՈՒՆ ԵՎ ՏԵԽՆՈԼՈԳԻԱ</b></p> <p>2.1 Քաղաքաշինություն և ճարտարապետություն</p> <p>2.2 Էլեկտրատեխնիկա, էլեկտրոնիկա, էներգետիկա, համակարգչային և տեղեկատվական տեխնոլոգիաներ</p> <p>2.3. Մեխանիկա</p> <p>2.4 Մեքենագիտություն և մեքենաշինություն</p> <p>2.5 Քիմիական տեխնոլոգիաներ</p> <p>2.6 Նյութագիտություն</p> <p>2.7 Բժշկական սարքաշինություն</p> <p>2.8 Էկոլոգիա</p> <p>2.9 Կենսատեխնոլոգիա</p> <p>2.10 Նանոտեխնոլոգիա</p> <p><b>3. �ԺՇԿԱԿԱՆ ԳԻՏՈՒԹՅՈՒՆՆԵՐ</b></p> <p>3.1. Ընդհանուր բժշկություն</p> <p>3.2. Կլինիկական բժշկություն</p> <p>3.3. Բժշկական կենսատեխնոլոգիա</p> | <p><b>4. ԳՅՈՒՂԱՏՆՏԵՍԱԿԱՆ ԳԻՏՈՒԹՅՈՒՆՆԵՐ</b></p> <p>4.1 Անասնաբուծություն, անասնաբուժություն</p> <p>4.2 Բուսաբուծություն</p> <p>4.3 Հողագիտություն, ագրոքիմիա, բույսերի պաշտպանություն</p> <p>4.4 Գյուղատնտեսական կենսատեխնոլոգիա</p> <p><b>5. ՀԱՍԱՐԱԿԱԿԱՆ ԳԻՏՈՒԹՅՈՒՆՆԵՐ</b></p> <p>5.1 Հոգեբանություն</p> <p>5.2 Տնտեսագիտություն և գործարարություն</p> <p>5.3 Մանկավարժական գիտություններ</p> <p>5.4 Սոցիոլոգիա</p> <p>5.5 Իրավունք</p> <p>5.6 Քաղաքական գիտություններ</p> <p>5.7 Սոցիալական և տնտեսական աշխարհագրություն</p> <p>5.8 Զանգվածային լրատվություն և հաղորդակցություն</p> <p><b>6. ՀԱՅԱԳԻՏՈՒԹՅՈՒՆ ԵՎ ՀՈՒՄԱՆԻՏԱՐ ԳԻՏՈՒԹՅՈՒՆՆԵՐ</b></p> <p>6.1 Պատմություն, հնագիտություն</p> <p>6.2 Լեզվագիտություն, գրականագիտություն</p> <p>6.3 Փիլիսոփայություն, էթիկա</p> <p>6.4 Աստվածաբանություն, կրոնագիտություն</p> <p>6.5 Արվեստագիտություն</p> |
|--|--|

ՀՀ ԿԳՄՍՆ ԳԻՏՈՒԹՅԱՆ ԿՈՄԻՏԵԻ  
ՆԱԽԱԳԱՀ ՊԱՐՈՆ ՍԱՐԳԻՍ ՀԱՅՈՑՅԱՆԻՆ

ՔԱՂԱՔԱՑԻ

\_\_\_\_\_ (անուն հայրանուն)

\_\_\_\_\_ից (ազգանուն)

\_\_\_\_\_ (հասցե)

\_\_\_\_\_ (հեռախոս)

ԴԻՄՈՒՄ

Խնդրում եմ ընդունել Գիտական և գիտատեխնիկական գործունեության պայմանագրային (թեմատիկ) ֆինանսավորման շրջանակներում «Հայաստանի Հանրապետության գիտական համայնքին արտերկրի գիտնականների ինտեգրմանն աջակցության ծրագիր 2023» մրցույթին մասնակցության «\_\_\_\_\_» վերնագրով հայտը:

Դիմող՝ \_\_\_\_\_  
(ստորագրություն)

(\_\_\_\_\_)  
(անուն, ազգանուն)

«\_\_\_» \_\_\_\_\_ 2023թ.

## Նախագծի վերնագիրը

## Ընդարձակ ամփոփագիրը

Ընդարձակ ամփոփագիրը գնահատվում է փորձաքննության առաջին փուլում, հարկավոր է ներկայացնել անգլերեն՝ մինչև 2 էջ:

Ընդարձակ ամփոփագիրը պետք է լինի **Նախագծի** հակիրճ տարբերակը՝ ներառելով հետազոտության կարևորությունը և նպատակահարմարությունը:

## Ն ա խ ա գ ի ծ

Ներկայացնել անգլերեն, մինչև 12 էջ՝ ներառյալ գրաֆիկները, գծագրերը, լուսանկարները և գրականության ցանկը.

**1. Համառոտ բնութագիրը** (անոտացիա)

**2. Հետազոտական խնդրի վերաբերյալ գիտելիքների ներկա վիճակի մասին վերլուծությունը**

**3. Ծրագրի նպատակները և խնդիրները**

**4. Հետազոտական նախագիծը**

**5. Իրականացման միջոցները: Մեթոդները**

**6. Օրացուցային պլանը** (ըստ եռամսյակների կամ Գանտի աղյուսակ)

**7. Խմբի ձեռքբերումները տվյալ ոլորտում, օտարերկրյա գործընկերոջ համապատասխանությունը**

**8. Խմբի զարգացման հեռանկարները** (ռիսկերը և հնարավորությունները)

**9. Ակնկալվող արդյունքների քանակական և որակական ցուցանիշները** (գիտական հոդվածներ, գիտաժողովների նյութեր և այլն), նորարարական կարողության օգտագործում (տեխնոլոգիական ներդրում, ցուցադրում, փորձնական նմուշ, նախատիպ և այլն), մտավոր սեփականության տնօրինում (արտոնագիր, հեղինակային իրավունք և այլն), միջազգային համագործակցային կապերի ամրապնդում, համագործակցության հեռանկարներ)

**10. Օգտագործված գրականության ցանկը**